

大哀經

第二

百二
發三

47788



元祿九年丙子二月日重脩

皇圖聖圖 帝階殿呂

佛日增輝 懋合輪常轉

山城州天安寺法金剛院置



大哀經卷第三

發

西晉元康年三歲竺法護譯

大哀品第六

佛復告揔教王菩薩菩薩有十六事常以大
衰加於衆生何謂十六於是菩薩除見貪身
衆生處在若干邪見則爲斷去迷惑疑業爲
說經法是爲菩薩興發大哀愍於衆生衆生
處在虛偽顛倒非常想常苦想爲樂無身想
身空有淨想當爲蠲除此顛倒行菩薩於彼
興發大哀爲說經典衆生處在計有吾我一
切無形而想有形當爲除去吾我之事菩薩
于彼興發大哀頌宣經道於此衆生處在五

蓋而自覆蔽墮在欲瘡多所危害睡寐無明
虛僞狐疑因緣所覆不了深法吾當為彼除
諸陰蓋菩薩于彼興發大哀為說經法衆生
處在六情罣礙眼見色而想著為文飾耳聲
鼻香舌味身觸意法而懷想著倚受文飾當
為此等滅除六情菩薩于彼興發大哀為說
經道衆生處在貢高自大憍慢求敬是我自
由咄吾志耶懷害虛僞餘人卑賤我為尊貴
自說我所行正於尊復尊經道又勝加復教
乃強綺於容色自計有識而自放恣永無所
獲自謂成就不賢嫉賢不聖嫉聖處於邪見
想住正道吾當為此說除憍慢貢高自大菩

薩于彼興發大哀為說經道衆生處在迷惑
邪徑離於聖路當為除邪顯示聖道菩薩于
彼興發大哀為說經道衆生處在虛偽恩愛
之著貪於妻息男女家居產業夙夜汲汲無
有懈廢當為除此令脫恩愛菩薩于彼興發
大哀為說經道衆生處在各共諍訟恚恨不
和懷結瞋怒多所訟理當為除此鬪諍瞋恚
菩薩于彼興發大哀為說經道衆生處在惡
友所攝離於善友興造惡業當為除此諸惡
知識使從善友菩薩于彼興發大哀為說經
道諸天處於慳惜貪饕不知懈倦離於聖慧
當為除此慳惜貪饕興隆聖慧菩薩于彼興

發大哀為說經道衆生處在非誼之業存有
常計斷滅之見當令入於深奧緣起之業菩
薩于彼興發大哀為說經道衆生處在無明
愚冥倚著我人壽命當為除去一切邪見令
逮賢聖清淨之眼菩薩于彼興發大哀為說
經道衆生處在娛樂生死誤受五陰五體之
賊當為除去一切三界之所倚著菩薩于彼
興發大哀為說經道衆生處於魔見繫縛處
於思想計是我所應與不應當令解脫魔網
繫縛依倚所著菩薩于彼興發大哀為說經
道衆人處在塞無為門開惡趣戶故當為闡
泥洹之門菩薩于彼興發大哀為說經道佛

言揔教王菩薩是為十六事菩薩大士興發大
哀愍加衆生也

大哀經開化品第七

爾時佛告揔教王菩薩復有三十二事所修
善業除不順教罪惡之業何謂三十二衆生
在於自大睡寐立見己身則以智慧而化導
之使入道義是為菩薩第一之業志樂於小
卑劣之乘計吾我人則開化之入於微妙無
極大乘衆生若處非法邪見計有身者則開
化之以己所樂正法之義勸助誘之觀於衆
生戒不清淨身業鮮潔本性和調則以此業
開化衆生見諸衆生墮于邪見六十二疑則

以正見賢聖之業化導群黎而建立之見於
衆生存在無明所念顛倒則開化之顯示道
明思惟柔順亦復自立於清和義見於衆生
遠離法行身自修法亦開化人住於正法而
復隨時為演經義見於衆生慳悋所蓋身心
不貪一切所有皆能惠施亦能化人惠諸所
有見諸衆生犯於諸惡任不謹慎身奉淨戒
亦化於人立於淨業見於衆生多所諍訟瞋
恚茂盛身修忍辱行慈心力亦復化人奉于
慈愍見於衆生處在懈怠多所廢落身不厭
倦勤行精進亦復化人夙夜勤力見於衆生
其心憤亂而志放逸身自攝意一心禪思令

不馳逸其意安詳亦開化人立於詳叙見於
衆生處於邪黠憍慢自大身修智慧離于愚
冥則以大智而開化之令除闇昧衆生處於
非時之行身則自壞善權方便修平等行亦
化於人權謀隨時奉平等業衆生處於塵欲
所危思想多不淨行應在不應身已永除恩
愛之原亦以化人除諸瑕穢見於衆生而處
貪身來致刑獄繫縛之患身除貪已衆結之
難亦化衆人捨於貪身一切顛倒見於衆生
不調無寂不順律教亦未得解身寂調定解
隨律教亦化衆人調定順律見於衆生不奉
孝順而無反復壞諸德本身承孝道亦修恩

義將護善原勸立衆人使修孝事常念反復
不失德本衆生處於罣礙諸蔽順從惡教身
度蔽礙亦化衆人使離罣礙衆生處於非惡
之教不歸先聖不順衆祐身奉善命從明智
教亦化衆人順從舊德咨受先達衆生處於
多爲無義虛僞之行汲汲忿忿身順義理務
衆德本亦復化人令勤修行立諸善原衆人
處於貧匱之行離賢聖財身修無窮遵於七
財信戒慚愧聞施智慧亦勸立人賢聖七業
衆生處於常遭疢疾攝載四虺身修無患安
隱無欲亦化衆人使除諸病永令無難衆生
處於若干闇冥離慧光明身修明曜化立衆

人無極大光衆生處於三界罣礙生死五趣
輪轉無際身自斷除三界之著而化衆人隨
時拔去三界之結衆人處於左道之業離於
右路身修正道亦立衆人住于右路衆生處
於貪身壽命不覩患難身不憺命見患所由
亦化衆人不倚身命察知衆難衆生處於離
佛法衆身自修德不斷三寶化立衆人隨三
寶教見於衆生捨于正法身護經典亦化衆
人將護大典宣傳佛教立于正法見於衆生
住遠世尊六思念教身隨六念亦化衆人奉
六思念見於衆生從於塵勞罪福之業身離
罪塵亦化衆人使捨殃穢見於衆生而從一

切不善之法普離衆善身修善法捨於非法
亦化衆人住於正真柔順之法是族姓子菩
薩所行平等之業當可所立能順如此則奉
正真無上大業

大哀經道慧品第八

佛告揔教王菩薩言又族姓子菩薩之業不
可稱載所以者何計如衆生貪欲諍門菩薩
修業積功累德合集衆行至初法門正使族
姓子江河沙等諸佛世界滿中衆生皆令成
立聲聞緣覺悉令此等一切衆生所立善業
不如發意菩薩功勳百倍千倍万倍億倍巨
億万倍不任爲喻所以者何自斷本性所習

塵欲聲聞緣覺住於緣合菩薩大士蠲除一切衆生塵勞所任緣合故族姓子一切衆生所可造業聲聞緣覺所立德本比菩薩業菩薩最上爲尊爲最無有疇匹所以者何凡夫愚人習從顛倒不順之業聲聞緣覺亦隨緣習菩薩業者無有顛倒功勳無量以是之故菩薩大士過於衆生越於聲聞緣覺之上於時揔教王菩薩聞佛所說歡喜踊躍善心生焉勸助讚善世尊所演至未曾有難及難及如來乃宣菩薩莊嚴菩薩光明菩薩大哀菩薩化業惟願世尊如來至真垂恩廣覆重復解說何因諸佛而於衆生興立大哀大哀何

所比像其事云何以比之瑞應云何住在何
所諸佛世尊造業云何善哉世尊如來皆知
亦能普見於諸所造業而覩悉達惟爲我等
而分別說佛告揔教王菩薩諦聽善思如來
當說如來大哀如來造業所可頒宣族姓子
知諸佛世尊不興大哀亦不奉行也所以者
何諸佛世尊常加大哀不捨衆生從無數劫
積累已成猶是之故不行退轉不捨衆生是
則名曰如來大哀其哀無量不可稱計難不
可當無可容處從始至終無能稱載所以者
何如來得道常懷大哀愍於衆生如其佛道
大哀亦如是何謂如來得至佛道如來得道

無本無住乃致大道於彼何謂而住於本已
計身本立在不誠思想之原以是之故如來
隨時合成於道名曰無本亦無所住以是如
來成最正覺因此達知一切衆生無住無本
解其所處當為宣傳如此之議令其曉了以
故如來於諸衆生常懷大哀又族姓子道者
寂然亦復澹泊何謂寂然云何澹泊於內寂
然於外澹泊所以者何其眼者空察無吾我
亦無所受耳鼻口身心亦復空耳亦無吾我
亦無所受是為眼空識別除此不為色逸是
謂寂然耳鼻口身意亦復空耳識別除此不
為諸法所見驅使是謂澹泊衆生之類不能

曉了此寂澹泊能明識斯以故如來於諸衆
生而懷大哀又族姓子道者本淨亦復顯曜
所謂淨者心本清淨何謂言曰其本清淨亦
復顯曜所謂淨者無所著故亦無所犯等如
虛空空本淨故與空合同等如虛空故曰空
等聚究竟本淨又極顯曜以故名曰本淨顯
曜愚癡凡夫不覺其實反為客塵而見染汙
吾當解彼本淨顯曜是故如來於諸衆生而
懷大哀又族姓子道無精進亦無不精進何
謂無精進亦無不精進攝一切法是則名曰
為無精進已能受習一切法者如來于彼亦
無精進亦無不進則度諸瀆又如來者於諸

流彼不見此跡彼岸以故名曰離此彼中如
來至真皆解諸法故成正覺由是名曰爲如
來也是無精進亦無不精進愚戇凡夫亦不
曉了吾當頌宣令解其意是故如來於諸衆
生而懷大哀又族姓子道者無想亦無因緣
何謂無想亦無因緣其眼於識而無所得其
無想者不見諸色則無因緣耳鼻口身意亦
復如是亦無所得亦無思想不見諸法則無
因緣是無想無緣爲賢聖行何謂聖行其於
三界而無所行是賢聖行其此無行爲賢聖
行愚戇凡夫不能曉了此賢聖行吾當開悟
使分別此是故如來於諸衆生而懷大哀又

族姓子道者無往無來現在等於三世斷於
三場何謂三場其心不退遊於過去亦不馳
騁於當來慧亦不退念於現在事於心意識
而無所住不想過去不念當來不戲現在等
於此三則淨三場愚癡凡夫不能曉了此賢
聖行吾當開悟使分別此是故如來於諸衆
生而懷大哀又族姓子道者無身亦復無數
亦無明識亦無耳鼻口身意諸所識者無爲
無數所謂無爲不起不壞亦無處所是則名
曰離於三相是以無爲如其無爲解了有爲
亦復俱然所以者何一切所有皆爲自然悉
無所有其無所有彼則無二以故無身亦復

無爲愚戇凡夫不能曉了吾當開悟使分別
此是故如來於諸衆生而懷大哀又族姓子
道者無所壞跡何謂爲跡何謂無壞無本爲
跡其無所任曰無所壞界則爲跡無我不壞
本際爲跡無動無壞空則爲跡無獲不壞無
想爲跡無念無壞無願爲跡無處無壞泥洹
爲跡無毀無壞是無壞跡愚戇凡夫不能曉
了吾當開悟使分別此是故如來於諸衆生
而懷大哀又族姓子道不從身而成正覺亦
不從心所以者何身者愚騃如草木牆壁瓦
石影譬心者如幻其以身心覺了如此是名
曰道假有言辭而言興盛又其道者無有言

辭亦無身心法與非法無道不道無誠無欺
所以者何道者無言於一切法而無有道何
所是處其於言辭而無所說猶如虛空無有
處所亦無所任無有言辭道亦如茲則無所
任亦無文辭如是其於諸法審實求道則無
文辭法亦無言若能曉了諸法無言是爲諸
法之所生也愚慙凡夫未能曉了吾當開悟
使分別此是故如來於諸衆生而懷大哀又
族姓子道者無取亦無所依何謂無取而無
所依斷於眼識而不受色亦無所得不依耳
鼻口身意斷無識者亦無所受亦無所得諸
法無獲是謂無依如來以此無受無依懷來

於道致最正覺眼於受色不以爲依識不退
從耳聲鼻香口味身受意法亦無所依識不
退從已不住識則能分別此一切衆生心之
所處何謂衆生心之所處衆生心處則有四
事何謂爲四一曰色心之處二曰痛癢三曰
思想四曰生死之處所彼於處所而無所住
如來明此於無住際愚戇凡夫不能曉了吾
當開悟使分別此是故如來於諸衆生而懷
大哀又族姓子道者則空謂空者道則爲空
所以空者諸法皆空如來於彼達無本空解
一切法而致正覺空亦復空故成正覺以此
一慧分別空事彼則無二其無二者空與道

慧則無有二已無有二法則無二已無有二
則無有名無相無底無行無所流布所可語
言所依受者是爲歸趣非真諦議何所有法
而逮色者空者自空猶如虛空所言虛空虛
空無言故曰空空無言亦空諸法處所爲若
此也至於無名不言有名如是無慢無言處
所亦無所處已無慢說無處所已名亦若茲
所說法者又計彼法無有言教亦無不教一
切諸法亦復如斯生亦復然無正無邪如來
無生曉了無本如來所知所解脫者不解不
縛是謂平等愚戇凡夫不能曉了吾當開悟
使分別此是故如來於諸衆生而起大悲又

族姓子道等如空其虛空者無等無邪道亦如茲無等無邪計於諸等無成道者彼無有等亦無有邪如來以此無等無邪解一切法而悉無本成最正覺又於諸法而不受正亦不受邪如其法數慧數亦如承佛聖言何謂佛聖法有所受者故曰爲有是則歸趣無所受者斯無有主則有無主以是自然而得逮成離於自然後無遊行亦無有進亦復無退是謂進行有所除斷如來說法斷如是行愚戇凡夫不能曉了吾當開悟使分別此是故如來於諸衆生而懷大哀又族姓子道如真跡何謂真跡計如道者色復亦如無本不退

又如道者痛想行識亦復無二而不退轉又如道者地水火風其種亦如而不退轉又如道者眼種色種及眼識種耳鼻口身意法識種亦復無本而不退轉諸法所絕使了陰種諸入如來于彼覺了真諦而成正覺所曉了者不從顛倒又如去本中後亦如其無本者而不退轉其本種者則無所生其地種者亦復無為中種澹泊是則名曰如真諦跡又如一事一切亦如如一切事一事亦如如一事者衆多亦然而不可得是為真諦愚慙凡夫不能曉了吾當開悟使分別此是故如來於諸衆生而懷大哀又族姓子道者入室則入

無室何謂為室何謂無室修行一切諸德善法是曰為室於一切法而無所獲是曰無室所以無室心無所住無有處所故曰無室無相三昧至解脫門故曰無室觀察想念稱量計校越度稱量故曰有室其無識業是曰無室觀察有為故曰有室觀察無為此則無室察於無為觀察無室得入無室則為道矣愚戇凡夫不能曉了吾當開悟使分別此是故如來於諸衆生而懷大哀又族姓子道無諸漏亦無所受何謂無漏何謂無受離於四漏名曰無漏一曰欲漏二曰有漏三曰癡漏四曰見漏離此四漏所謂無受離四事受一曰

受欲二曰受有三曰受見四曰倚戒離此四
受彼此四受悉歸無明恩愛所纏依倚於內
從內發起如來至真除于內受所生根本於
內清淨歸趣一切衆生清淨其內淨者彼無
想念已無想念除於顛倒惟念柔順不住無
明已不住無明則不復住十二有數已能不
住十二有數則無所生其無所生彼則寂然
其寂然者彼則無議其無議者乃第一議其
第一議乃爲究盡其究盡者彼無人議其無
人議無所獲議其無獲議則如來道是十二
緣已了十二則曰法議其法議者是則名曰
覩見緣起其覩緣起則見於法其見法者則

見如來如是觀者則無有本性極本末所有
見乎何曰所有於諸所想不與因緣此謂於
想而無因緣如是察者乃爲正覺如來所解
如是像法普行平等其所等者亦無偏邪如
是平等無有諸漏亦無所受愚戇凡夫不能
曉了吾當開悟使分別此是故如來於諸衆
生而懷大哀又族姓子道者清淨無垢無染
何謂清淨無垢無染空則清淨無相離垢無
願無染無生清淨無汙離垢無起無染本性
清淨解脫無染無放逸則清淨亦無輕戲爲
離垢寂調則無染無本爲淨法界顯曜本際
無染虛空清淨虛無無垢恍惚不染除內爲

淨於外無逸則曰無垢無內外行則曰無垢不
習諸入則曰無染慧盡過去淨了淨於當來不
起無垢分別現在任於法界則無所染是謂清
淨無垢無染而平等御於一法矣至寂然迹其
寂然者則為澹泊寂然澹泊是謂仁和是族姓
子猶如虛空道亦如之如其道者法亦如之如
一切法衆生亦如又如衆生國土亦如如其國
土泥洹亦如如泥洹等見於諸法究盡寂然
此已辯矣於諸部黨而無部黨是爲清淨無
垢無染如來于彼於諸色像了一切法而無
色像成等正覺觀於一切衆生之界無淨無
垢於此諸數是則名曰寤寐衆生而懷大哀

如來則以善權方便感致梵天不以無請而
轉法輪於彼應時六万八千梵天之衆自於
天宮忽然不現在波羅柰鹿菴之中住世尊
前誓首足下勸請世尊今轉法輪惟願大聖
頒宣經道若說法者多所救濟梵天亦時歎
此頌曰

正使諸法寂然澹泊清淨鮮潔無垢無染
既不可獲無音無作則以道慧最勝悉了
於無數劫造立愆哀勤行難量精修長久
欲得開化衆生迷惑睡眠來久大愚所蔽
衆生多有曉了積德本以曾修故詣最勝
必當識別殊異尊法惟願如來時轉法輪

已得攝伏魔所處場 尋時開化於甘露門
為衆廣演賢聖句迹 惟願導師顯示道徑
假使正覺矜哀無盡 垂愍衆人轉無思議
我身今日勸請至尊 惟願最上道法之輪
設使大聖懷于恩慈 猶拘那鎗佛講說教
亦如迦葉轉其法輪 惟願世尊頒宣經道
譬言如天雨多所潤澤 生於藥草及茂五穀
以大哀雲普周世間 如來為雨正法之水
從始生時口宣妙言 聖自發生當度衆生
群庶悉集渴仰飢虛 惟以法味除其消渴
佛言如是族姓子其梵天王勸請如來殷懃
若茲又佛正覺不捨太哀在波羅柰仙人所

止菴園之中尋時即轉無上法輪沙門梵志
諸天魔神梵天王世人所不能制所講經道
出非常音告於三千大千世界比丘拘輪晉

本際第一解法於時世尊宣于詩頌

深妙不可獲

第一無所作

拘輪解本際

不懷於結恨

如來說此法輪之經不可稱計無央數人衆
生之類受教隨律見於如來興闡大哀無量
無限難不可計會群黎之黨皆發無上正真
道意是族姓子諸佛世尊以十六事愍念衆
生而懷大哀常以慈愍未曾忽忘彼亦無業
不懷恐怖如來所修無極之哀不可稱載為

一一人而造立行江河沙劫忍在地獄初不
退還以是方便使使諸衆生隨律受教賢聖之
法以此比像如來至真爲諸衆生各各一一
受形命者爲一一人各各恒河沙劫忍於地
獄勤苦之患欲使衆人隨律受教入賢聖法
如來不以懈倦而厭不違大哀族姓子知諸
佛世尊愍哀衆生巍巍如是常懷大哀又族
姓子諸弟子衆聲聞種類志懷恐懼其所愍
哀畏怖如魚慈猶肌膚菩薩之慈猶如骨髓
諸佛世尊懷無量哀常當勸助求於佛慧化聲
聞哀令入道心奉菩薩哀諸佛世尊決於道
慧故懷大哀聲聞哀者察於慈心瞻察開化

為菩薩哀究盡啓導為佛大哀馱造立行為
聲聞哀精勤轉上為菩薩哀超越諸行為佛
大哀是族姓子諸佛出世尊而於衆生常懷大
哀一劫百劫千億萬劫為一人故住在世間
劫數難計不可稱載而於泥洹不永滅度也
必當濟之故族姓子當解知此其佛大聖如
來至真在於衆生而懷大哀

大哀經宣劫世品第九

佛言族姓子乃往過去久遠之世不可計會
無能稱載長遠懸曠不可議劫余乃有佛名
栴檀香如來至真等正覺而出于世世界曰
香土劫号上香其佛壽命千二百七十三萬

六千歲其聲聞衆亦八百六十八萬六千人
諸菩薩衆不可稱限其如來正直真有一毛孔
所演妙香熏周三千大千世界其熏巍巍資
羨難量彼佛世界曾無穢氣其土所有牆壁
樹木山陵谿谷所有形色以如來香皆被蒙
熏香氣芬馥不可爲喻以故世界名曰香土
其有人衆生彼佛土皆悉被荷如來聖香使
身口意不被殃豐若有出家在其佛所作沙
門者聞此妙香皆得四禪其土已更曾與千
佛悉同一字号曰栴檀香以故其劫名曰上
香栴檀香作佛事竟然後乃當取般涅槃臨
滅度時察衆生界何許是人吾應當化令隨

律教則道眼見有想無想天而有所化異人
宿世曾已植衆德本志在微妙佛應所化在
彼天上八万四千劫在於彼境乃生人間無
有欲塵聞大乘德當發無上正直道意志不
退轉時栴檀香如來至真以權方便懷抱大
哀故示因緣告諸比丘今是吾時當般涅槃

欲取滅度於時其佛興隆大哀有三昧名曰
無猷定意正受現大滅度然後廣布舍利靡
不周接其正法住千八百四十八万四千歲
斯法開化多所救濟當尔之世無有像法彼
佛出世尊以三昧力等以神足建立神聖八万
四千劫在彼沒形而不自現如是族姓子於

八万四千劫於所在開化其彼天人。在有想無想天。竟八万四千劫壽已。還生人間。在尊者家。年適八歲。是栴檀香如來。至真乃從三昧起。在尊者家。顯佛身形。往詣子前。入其家中。餘人不覩。八歲童子獨見之。耳其童子者。曾志大乘如應說法。演家患難。咨嗟大道。不可稱載。于時童子至心淳和。發於無上正真道意。尋時得成不退轉法。佛見彼心。則授其決。過七万二千阿僧祇劫。當成無上正真之道。為最正覺。名曰寶上如來。至真等正覺。明行。成爲善逝。世間解無上士道法。御天人師。為佛衆祐。其餘人者。不聞授決。獨此童子一。

身知耳本應器故時万二千天子聞所授決
淑淳一心發無上正真道意各自興願寶上
如來成正覺時吾等當生於彼佛土其佛所
說必當如願生於彼土寶上佛所時栴檀香
佛授諸菩薩前已乃就泥洹而取滅度諸天
人民供養舍利故族姓子諸佛世尊大哀具
足巍巍若斯非聲聞緣覺地所能及又族姓
子諸佛聖教若斷絕時尋復續立諸天中天
所發衆祐其等功德益加熾盛所化轉茂至
不滅度思報功祚終不相違而亡失也如來
講此大哀議時於大會中三分江河沙等衆
生之類皆發無上正真道意減半江河沙等

諸菩薩衆逮柔順法忍江河沙等諸菩薩衆
成立大哀逮得揔持如佛世尊又其法忍名
阿惟顏逮成此忍于時衆會聞說此言歡喜
踊躍善心生焉俱共咨嗟世尊之德便兩天
華供養世尊樂器自鳴當是之時莫不坦然
大哀經處處業品第十

佛告族姓子何謂如來所作事業如來事業
有三十二何謂三十二則以佛無上之慧處
處如有知非處如有知有限無限有爲無爲
靡不通達彼何謂處何謂無處所言非處無
處救濟身行惡口言惡心念惡欲得可意所
欲必獲歡悅之報生於善處未之有也所謂

處處如有所望得護身行善口言善心念善
欲得可意歡悅安隱恩德之報歸於善處此
事必果其慳貪者欲得財富犯於禁戒而作
衆惡望生天人懷毒瞋恚欲求端正懈怠得
道其志迷亂眩惑放逸欲入寂滅其懷邪智
馳騁不正欲得壞除罣礙正處懷來真實此
不可果施望大富持戒生人忍辱端正精進
得度禪定入寂正慧聖達蠲除罣礙所止之
處此事必果又復預知其犯逆者心不存定
禁戒清淨心常寂然知行顛倒不能逮得柔
順法忍如篤信空逮得法忍知狐疑者心不
休息知除結網心得止息知於女人不以此

身成轉輪王天帝梵天魔王之主在世尊前
佛知於女人轉女形已成轉輪王釋梵魔王
在世為佛知轉輪王以正治國慈愍萬民不
行邪惡民知轉輪王不行枉橫以邪治邦侵
怨萬民知鬱單越人終不犯惡墮苦地獄知
其此人必生天上快樂之處知殺生者欲得
長壽盜竊不失姪姪化生妄言求辯醉酒不
亂兩舌求和惡口咨嗟綺語求名瞋求好顏
諍訟求安邪見望度此事未果慈仁不殺欲
望長壽清廉不盜欲望不失貞潔不姪忠信
不欺聖慧不醉不鬪彼此言和不鹿辭質不
飾忍辱不瞋放捨不貪正見不邪必得長壽

財安不失妻息貞良口氣香好點慧識議眷
屬和穆衆人讚揚聽採其言財寶豐饒莫不
瞻顏世世識道此事悉果豫知八等不得不
至於果證也知得果證得入於時知於道跡
不復往來八返生死又知往還不復三返而
周旋知於往來二返周旋棄於五陰而取滅
度知於不還不復還返歸於此世知所在處
而取滅度知無所著不復牽連而有處所知
無所著無餘終始知賢聖士不捨佛道歸於
異學知賢聖士當歸命佛不信外道又豫覩
知菩薩逮得不起法忍終不退轉還就小乘
無所從生法忍菩薩必成其道不復迴還豫

知菩薩坐佛樹下不成正覺終不起也坐於
樹下成於無上正真之道必果不疑豫知如
來道慧廣遠而無罣礙欲求如來慧不通達
而有蔽礙未之有也欲令如來聖慧損耗而
不周普未之有也世尊道慧懸曠周接靡不
通達豫知假使有人欲見佛心未曾有也如
來心者天上天下無能見者知天上天下欲
見佛頂無能堪任覩佛頂者預知如來常定
心未曾忘普見一切衆生所念豫知佛心未
曾罣礙心常一定見於本際豫知世尊從本
已來而無有失所說至誠言滿十方常無口
過豫知欲求世尊使有闕漏諸佛大聖身行

清淨超明月珠日月釋梵虛空清淨無能及者佛天中之天道慧超殊巍巍無侶不可爲喻是族姓子如來處處力無限量所說無際所暢文字真諦無欺佛於是頌曰

地尚可擘裂

空無動使動

欲使佛所說

無能令有處

丈夫尚能化

令空爲五色

世尊所說處

無能令有處

佛之所宣暢

上下并中間

一切悉至誠

莫能令不及

若說非處處

上下及中間

此事悉真正

終無有變異

曉了其處處

而爲講經法

是故實無虛

悉見心志性

異學外道士

所在皆馳逸

用不達處處

佛正覺無此

其知處非處
尋為說其處
隨時而觀察
諸佛殊勝道
無量不可計
外道無能建

隨時度衆生
衆生無應器
以何能將養
所任無殃疊
說處及非處

諸佛名稱廣
佛亦觀於彼
是為第一乘
則以度衆生
是為大仙力

大哀經卷第三

發

汲

音急

貪餐

下音貪也

闡

昌演

憤亂

上心

俱

妹

反

黯

開

八反

忿忿

七速

紅

反

貧匱

下求

位

反

疾

反

疾

上

刃

四

虻

下許鬼

反

澹泊

上徒

敢

反

疾

反

疾

反

疾

上

薄

瀆

音讀

愚顛

下竹

馳騁

下丑

領

反

愚

音淡


駭

下音

語

下音

媿	近	舍	反	措
一	也	含	上	
反	夷	音		痛
				癢
		谿	下	
		字	音	亦
		上	音	作
		音	音	音
				養
				恍
				惚
				上
				兄
				往
				反
				下
				音
				忽
				那
				詐
				下



猪飼順良亭附

